

Aois Tosaithe Ar Scoil - Treoir Do Thuismitheoirí



Achoimre

1. Sa treoir seo tá breac-chuntas ar chuid de na saincheistanna ar chóir do thuismitheoirí a machnamh a dhéanamh orthu nuair atá an páiste acu ag tarraingt ar aois bunscoile.
2. Tá réimse de reachtaíocht i bhfeidhm a bhaineann leis an ábhar seo. Tá achoimre air sin thíos. Tá an Roinn ag dúil go mbogfaidh páistí tríd an scoil de ghnáth leis an aoisghrúpa chroineolaíoch acu (i.e. páistí a rugadh taobh istigh de 12 mhí óna chéile ón 2^ú Iúil go dtí 1^ú Iúil an bhliain dár gcionn).

Cé dó a bhfuil an chomhairle seo?

3. Is do thuismitheoirí go príomha atá an chomhairle seo agus díreofar aird na mball foirne lena mbaineann sí sa Roinn Oideachais agus san Údarás Oideachais (ÚO) uirthi chomh maith; scoileanna agus suíomhanna oideachais réamhscoile. Tá sí ar fáil fosta trí www.deni.gov.uk agus www.eani.gov.uk.
4. Má tá ceistanna ar bith agat faoi na saincheistanna a bhfuil breac-chuntas orthu sa treoir seo, iarrtar ort amharc ar na sonraí teagmhála don Údarás Oideachais agus don Roinn Oideachais thíos.

Clár Ábhair

An cúla le Bonnnhéim an Churaclaim	2
Aois Éigeantach Scoile - an sainmhíniú dlíthiúil	3
An próiseas le cur isteach ar áit i mBliain I	4
Má bhíonn imní ort go mbeidh sé deacair ag do pháiste socrú isteach sa bhunscoil	4
Riachtanais Speisialta Oideachais	4
Comhairliúchán ar Aois Tosaithe ar an Scoil a chur siar	5
Do chuid socruithe féin a dhéanamh le hoideachas a chur ar do pháiste atá in aois éigeantach scoile	5
Oideachas a chur ar pháiste taobh amuigh dá (h)aoisghrúpa croineolaíoch féin	6
Sonraí teagmhála don ÚO / RO	6
Ceisteanna Coitianta	7

An Cúla le Bonnnhéim an Churaclaim

5. I mBonnnhéim an churaclaim cuirtear tús le hoideachas éigeantach do pháistí ar an bhunscoil agus ceapadh an Bhonnnhéim chéanna go sonrach do pháistí i mBliain I agus i mBliain 2 sa bhunoideachas. Is múinteoirí cáilithe a sholáthraíonn í, agus is minic a thacaíonn cúntóirí ranga leo. Tá tuilleadh eolais ar an Bhonnnhéim le fáil ar shuíomh [gréasáin Churaclam TÉ](#).

6. Tá sé de chuspóir ag an Bhonnnhéim athrú réidh a sholáthar ó thréimhse an oideachais réamhscoile go dtí an bhunscoil. Aithnítear inti go mbíonn páistí óga ag teacht chun na scoile ó chúlraí éagsúla i ndiaidh dóibh réimse ilghnéitheach d'eispéiris foghlama a bheith acu sa bhaile agus,

i gcás a bhformhór, tá a bheagán nó a mhórán d'oideachas réamhscoile acu. Ceapadh í le cur leis na heispéiris a fuair na páistí cheana féin trí chlár cuí foghlama a chur ar fáil leis na scileanna agus leis na hábaltachtaí a thabhairt do pháistí a bheas de dhíth orthu le go n-éireoidh leo agus iad ar scoil agus nuair a thiocfaidh siad i méadaíocht.

7. Soláthraíonn an Bhonnnhéim an timpeallacht foghlama is fearr a fhóireann do na riachtanais phearsanta ar leith atá ag páistí óga. Úsáidtear an súgradh inti mar chomhthéacs le haghaidh foghlama mar go n-aithnítear go bhfuil an spreagadh a fhaigheann an páiste sa tsúgradh ina chuid thábhachtach dá fhorbairt fhisiceach, shóisialta, mhothúcháin agus oideachais. De réir mar a bhogann páistí tríd an Bhonnnhéim, tugtar foghlaim níos foirmiúla dóibh, go

háirithe forbairt scileanna litearthachta agus uimhearthachta. Déantar sin ar luas ina gcuirtear a n-aois agus an méid forbartha atá déanta acu san áireamh.

8. I dTuirisc an Phríomhchigire (2012-14) fuarthas amach sna ceachtanna Bonnchéime a ndearnadh luacháil orthu, go raibh 84% maith, an-mhaith nó sármhaith. Tríd is tríd, fuarthas amach 'gur mhór an cuidiú iad gníomhaíochtaí bunaithe ar an tsúgradh agus gníomhaíochtaí foghlama eile le scileanna luathlitearthachta agus luathuimhearthachta a fhorbairt.'

Aois Éigeantach Scoile - an sainmhíniú dlíthiúil

9. Tá aois éigeantach scoile faoi rialú ag Airteagal 46 d'Ordú Oideachais agus Leabharlann (Tuaisceart Éireann) 1986. I gcás páistí a bhain aois 4 amach ar 1 Iúil nó roimhe, tosóidh siad ar an bhunscoil ag tús Mheán Fómhair na bliana sin. **Sa doiciméad seo, tá cur síos againn ar bhliainghrúpa na bpáistí atá ag tosú ar an scoil le chéile mar 'an aoisghrúpa croineolaíoch'.**

Roinnt samplaí:

- 1: Ar 1 Meán Fómhair 2015 in aois a 5 bliana a thosódh páiste a rugadh ar 1 Meán Fómhair 2010 ar an scoil.
- 2: Ar 1 Meán Fómhair 2015 in aois a 4 bliana agus 2 mhí a thosódh páiste a rugadh ar 1 Iúil 2011 ar an scoil.
- 3: Ar 1 Meán Fómhair 2016 in aois a 5 bliana agus 2 mhí a thosódh páiste a rugadh ar 2 Iúil 2011 ar an scoil.

10. Áirítear na rudaí a leanas sna forálacha reachtach le haghaidh tosú ar an scoil agus áiteanna maoinithe oideachas réamhscoile:

- In [Airteagal 45 d'Ordú Oideachais agus Leabharlann \(Tuaisceart Éireann\) 1986](#) mínítear na dualgais atá ar thuismitheoirí oideachas a chur ar a bpáistí. Deir sé go gcinnteoidh tuismitheoir gach páiste in aois éigeantach scoile go bhfaigheann an páiste oideachas lánaimseartha a fhóireann dá (h)aois, dá c(h)umas, dá (h)ábaltacht, agus do riachtanas speisialta oideachais ar bith eile a bheadh aige nó aici. D'fhéadfaí sin a dhéanamh trí fhreastal rialta ar scoil nó ar dhóigh eile.
- In [Sceideal 13 d'Ordú 1986](#) foráiltear do chur i bhfeidhm Airteagal 45 maidir le hoideachas páistí in aois éigeantach scoile.
- In [Airteagal 46](#) agus [46a d'Ordú Oideachais agus Leabharlann \(Tuaisceart Éireann\) 1986](#) tá sainmhíniú ar aois éigeantach scoile agus an aois chroineolaíoch le haghaidh aistriú chuig iarbhunscoil.
- In [Airteagal 17\(8\) d'Ordú Oideachais \(Tuaisceart Éireann\) 1998](#) tá sainmhíniú ar aoisraon na bpáistí atá i dteideal cur isteach ar áit mhaoinithe oideachas réamhscoile.
- In [Cuid III d'Ordú Oideachais \(Tuaisceart Éireann\) 1997](#) cinntítear na socruithe do rollú oscailte.

An próiseas le cur isteach ar áit i mBliain 1

11. Maidir le foirmeacha iarratais do Bhliain 1, eolas ar an phróiseas iontrála agus ar na critéir iontrála do gach scoil is féidir iad a íoslódáil ó shuíomh gréasáin ÚO (<http://www.eani.org.uk/>) nó is féidir breathnú orthu i mbunscoil ar bith nó i leabharlann ar bith. Foilseofar an t-eolas seo ar líne agus i gcóip chrua sé seachtaine roimh dháta deiridh na n-iarratas. Moltar duit ceithre scoil ar a laghad a chur i liosta, in ord tosaíochta, ar an fhoirm iarratais agus a chinntiú go ndéantar taifead ar an fhoirm iarratais de gach eolas atá ábhartha do chritéir iontrála gach scoile. Ba chóir duit an fhoirm iarratais a chur ar ais chuig Príomhoide na scoile atá mar an chéad rogha agat.
12. Tá uasteorainn le líon na bpáistí a ligtear isteach i ngach scoil, uasteorainn a shocraíonn an Roinn Oideachais. Más rud é gur mó an líon iarratas ná an líon iontrálacha, úsáidfí Bord na nGobharnóirí na critéir iontrála atá foilsithe ag an scoil lena shocrú cad iad na páistí a dtáirgfear áiteanna dóibh. Mura ligtear do pháiste isteach sa scoil atá mar an chéad rogha agat, cuirfear d'iarratas chuig an scoil atá mar an dara rogha agat. Leanfar leis an phróiseas chéanna arís agus arís eile go dtí go nglacfaidh scoil le do pháiste nó go dtí nach bhfuil rogha ar bith fágtha. Más rud é nach dtáirgtear áit do do pháiste, rud nach dócha, cuirfidh an ÚO ar an eolas thú faoi na scoileanna a bhfuil áiteanna go fóill ar fáil iontu, agus fiafróidh siad díot cé acu de na scoileanna sin a bhfuil tú ag iarraidh do pháiste freastal uirthi.

Má tá imní ort go mbeadh sé deacair ag do pháiste socrú sa bhunscoil

13. D'eisigh an Roinn Oideachais treoir ar 14 Aibreán 2015 ar "[Ionduchtú agus Aistriú go Bliain 1 sa Bhunscoil](#)". Tugadh chun suntais go mb'fhéidir go mbeidh ar scoileanna socruithe eile a chur i bhfeidhm le haghaidh ionduchtú agus aistriú go Bliain 1 le go gcuirfí san áireamh tosca aonair páistí, lena n-áirítear riachtanais speisialta oideachais ar bith a bheadh acu.
14. Má tá ábhar imní ar bith agat nó má shíleann tú go mbeadh socruithe breise de dhíth ar do pháiste le go socróidh sé nó sí sa bhunscoil, iarrtar ort teagmháil a dhéanamh leis an Phríomhoide sa bhunscoil a bhfuil tú ag iarraidh do pháiste freastal uirthi.

Riachtanais Speisialta Oideachais

15. B'fhéidir go mbeadh riachtanais speisialta oideachais (RSO) ag roinnt páistí am éigin le linn a saoil scoile. Déanfar freastal ar riachtanais bhunús na bpáistí i scoileanna príomhshrutha agus gan [measúnú nó ráiteas RSO](#) reachtúil acu. Mar sin féin, i gcásanna áirithe beidh riachtanais ag an pháiste a fhágann go bhfuil ráiteas RSO de dhíth air nó uirthi.
16. I gcás páistí a bhfuil RSO acu, lena n-áirítear páistí a bhfuil ráitis acu, ba chóir oideachas a chur orthu i gcuideachta a bpiaraí i scoileanna príomhshrutha nuair is cuí agus i ndiaidh mianta a dtuismitheoirí a chur san áireamh.
17. Má tá imní ar bith ort nó má chreideann tú go m'b'fhéidir go bhfuil RSO ag do pháiste, iarrtar ort

teagmháil a dhéanamh le [Seirbhís um Oideachas Speisialta](#) an ÚO a thugann comhairle, eolas, agus tacaíocht do scoileanna agus do thuismitheoirí.

Comhairliúchán ar Aois Tosaithe ar an Scoil a Chur Siar

18. Rinne an Roinn comhairliúchán in 2014/15 ar thograí le rogha a thabhairt do thuismitheoirí an aois a thosódh a bpáiste ar an scoil a chur siar i gcásanna eisceachtúla. Tá achoimre ar thorthaí an chomhairliúcháin ar fáil ar [ghréasán RO](#). Tá sé socraithe ag an Aire [gan](#) dul ar aghaidh faoi láthair le reachtaíocht a thabharfaidh ar aghaidh próiseas iarratais le haois tosaíthe scoile a chur siar. Mar sin féin, tá sé go fóill ag iarraidh go dtiocfaidh an reachtaíocht tríd chomh luath agus is féidir. Mar sin de, [níl](#) de rogha ag tuismitheoirí iarraidh go ndéanfar aois tosaíthe scoile a chur siar.

Do chuid socruithe féin a dhéanamh le hoideachas a chur ar do pháiste atá in aois éigeantach scoile

19. Tá dualgas ar thuismitheoirí a chinntiú go bhfaigheann a bpáiste oideachas fóirsteanach lánaimseartha nuair a bhaineann sí nó sé aois éigeantach scoile amach. Is é an dóigh is minice a bhíonn ag tuismitheoirí leis sin a dhéanamh ná a bpáiste a chur ar scoil. Mar sin féin, is féidir le tuismitheoirí cinneadh ar shocruithe dá gcuid féin
20. I gcás tuismitheora a chuir oideachas ar a p(h)áiste taobh amuigh den scoil agus a shocraíonn ina dhiaidh sin gur chóir don pháiste freastal ar scoil, ba chóir do thuismitheoirí teagmháil a dhéanamh leis an Phríomhoide sa scoil ar mhaith leo an páiste acu freastal uirthi. Molann muid do thuismitheoirí sin a dhéanamh i bhfad sula dtosódh an páiste ar an scoil. Ní chuirfí an páiste sa bhunscoil tríd an ghnáthphróiseas iontrála.
21. A fhad is atá go leor spáis ag an scoil leis an pháiste a ligean isteach ina líon ar rolla¹, d'fhéadfadh tuismitheoirí iarratas a chur isteach ag iarraidh go rachadh a bpáiste isteach ina (h)aoisghrúpa croineolaíoch.

I.
Tugtar líon iontrálacha agus líon ar rolla do gach scoil. I gcás na bunscoile, is é an líon iontrálacha ná an líon páistí is féidir léi a ghlacadh isteach i mBliain 1. Is é an líon ar rolla ná an líon páistí is féidir léi a chur ar an rolla sna bliainghrúpaí uilig le chéile. Is páistí de bhreis ar an chuóta iad páistí atá ar ráiteas nó a ligtear isteach i ndiaidh achomhairc.

Oideachas a chur ar pháiste taobh amuigh dá (h)aoisghrúpa croineolaíoch féin

22. I gcásanna eisceachtúla, b'fhéidir gurbh fhearr don pháiste oideachas a fháil taobh amuigh dá (h)aoisghrúpa croineolaíoch. B'fhéidir go 'léimfeadh' roinnt páistí bhliain agus go rachadh siad isteach i mbliainghrúpa atá níos faide ar aghaidh; b'fhéidir go ndéanadh roinnt páistí bliain den dara huair; Mar shampla, b'fhéidir gurbh fhearr do roinnt páistí nach é an Béarla an chéad teanga acu oideachas a fháil ar feadh tréimhse le bliainghrúpa atá thíos faoina n-aois chroineolaíoch.

23. Maidir leis an chinneadh páiste a choinneáil i rang **taobh amuigh** dá (h)aoisghrúpa croineolaíoch nó páiste a bhogadh **isteach** ina (h)aoisghrúpa croineolaíoch, is é Bord na nGobharnóirí a dhéanann sin, i ndiaidh tuairimí na dtuismitheoirí

a chur san áireamh, agus comhairle a fháil ón Phríomhoide agus aird a thabhairt ar chomhairle a fuarthas ó ÚO. Tá an Roinn ag moladh go ndéanadh Príomhoidí bunscoile gach cás dá leithéid a athbhreithniú ar bhonn bliantúil. Mar sin féin, aithníonn an Roinn nach ionann gach cás agus gur chóir gach cás a mheas ar a bhuanna féin. Is é leas an pháiste an rud is tábhachtaí.

24. Maidir le haistriú ón bhunscoil go dtí an iar-bhunscoil, beidh ar Bhord na nGobharnóirí nuair atá sé fóirsteanach, i gcás páiste atá ag fáil oideachais taobh amuigh dá (h)aoisghrúpa croineolaíoch, a mheas cé acu ba chóir dó nó di aistriú bliain níos moille nó bliain níos luaithe ná mar is gnách nó aistriú ag an ghnátham. **Ba chóir i gcónaí leas an pháiste a bheith i gcroílár na cinnteoireachta.**

Sonraí teagmhála don UÓ / RO

25. Má tá ceisteanna ar bith agat faoin treoir seo iarrtar ort teagmháil a dhéanamh ag an tseoladh ríomhphost nó ar an uimhir ghutháin a leanas:

a. Údarás Oideachais:

Florence McCaw ríomhphost: Florence.McCaw@eani.org.uk
Guthán: 028 9056 6981

b. Department of Education:

Dale Heaney ríomhphost: de.curriculumdevelopmentteam@deni.gov.uk
Guthán: 028 9127 9402

Ceisteanna Coitianta

C1: An bhfuil próiseas ann le haois tosaíthe scoile mo pháiste a chur siar?

Níl próiseas reatha ann le haois tosaíthe páiste a chur siar.

C2: An bhfuil cead ag mo pháiste fanacht i suíomh oideachas réamhscoile maoinithe go ceann bliain eile in áit tosú ar scoil nuair atá sé nó sí 4?

Níl páiste atá thar aois éigeantach scoile i dteideal áite in oideachas réamhscoile maoinithe.

C3: D'éirigh le roinnt tuismitheoirí a bpáiste “a choinneáil siar” ar feadh bliana gur mheas siad go raibh sé nó sí réidh don scoil – cad é mar a d'éirigh leo sin a dhéanamh?

Is eol don ÚO go bhfuil roinnt bheag tuismitheoirí ann a shíl, ar chúis amháin nó ar chúis eile, nach raibh a bpáistí réidh le tosú ar an scoil agus a rinne a socruithe féin le hoideachas a chur ar a bpáistí in áit iad a chur ar scoil.

bpáiste réidh le tosú ar an scoil nó nach bhfuil, molann muid go láidir dóibh sin a phlé leis an Phríomhoide sa scoil a raibh siad ag iarraidh áite inti. Más rud é go bhfuil páiste ag tosú ar scoil níos moille ná mar is gnách, níor chóir don Phríomhoide an páiste a ligean isteach mura bhfuil spás ag an scoil taobh istigh dá líon ar rolla.² Tabhair do d'aire i gcónaí go n-éilíonn an dlí gur chóir do gach páiste in aois éigeantach scoile oideachas lánaimseartha a fháil ‘a fhóireann dá (h)aois, dá c(h)umas, dá (h)ábaltacht agus do riachtanais speisialta oideachais ar bith a bheadh aige nó aici agus go bhfaigheadh sí nó sé sin ar scoil nó ar dhóigh eile”.

2. Tugtar líon iontrálacha agus líon ar rolla do gach scoil. I gcás na bunscoile, is é an líon iontrálacha an líon páistí is féidir léi a ghlacadh isteach i mBliain 1. Is é an líon ar rolla ná an líon páistí is féidir léi a chur ar an rolla sna bliainghrúpaí uilig le chéile. Is páistí de bhreis ar an chuóta iad páistí atá ar ráiteas nó a ligtear isteach i ndiaidh achomhairc.

C4: Má dhéanaim mo chuid socruithe féin le hoideachas a chur ar mo pháiste go ceann bliana nuair is gnách le páiste a bheith i mBliain 1, cén bhliain a rachadh sé nó sí isteach inti dá gcuirfinn an páiste ar rolla i mbunscoil mí Mhéan Fómhair ina dhiaidh sin?

Sa chás sin, chomhlánófaí Foirm API (“[Iarratas ar iontráil i mbunscoil/in iarbhunscoil seachas Bliain 1 agus Bliain 8](#)”) atá ar fáil ó shuíomh gréasáin an ÚO mar go mbeadh do pháiste taobh amuigh den phróiseas oscailte rollaithe (do Bhliain 1). Ligfí do pháiste isteach ina (h)aoisghrúpa croineolaíoch (sa tsampla seo Bliain 2) sa bhunscoil. Agus tú ag iarraidh go nglacfar do pháiste isteach i scoil, ba chóir duit teagmháil a dhéanamh leis an Phríomhoide sa scoil a bhfuil tú ag brath an t-iarratas a chur chuici. Ní féidir leis an Phríomhoide an páiste a ligean isteach ach má tá spás ag an scoil ina líon ar rolla.

C5: Má dhéanaim cinneadh mo shocruithe féin a dhéanamh le hoideachas a chur ar mo pháiste (de réir an dualgais atá ar thuismitheoir oideachas fóirsteanach a shocrú) cé leis ar chóir dom teagmháil a dhéanamh?

Molann muid go láidir duit teagmháil a dhéanamh leis an Údarás Oideachais (ÚO) mar go mbeidh sé ábalta treoir, comhairle

agus eolas úsáideach a chur ar fáil. Más rud é gur táirgeadh áit sa bhunscoil do do pháiste cheana féin, ba chóir duit a insint don Phríomhoide sa scoil sin nach bhfuil an áit sin de dhíth ort níos mó sa dóigh gur féidir í a thabhairt do dhuine eile. Má chreideann an ÚO in am éigin nach bhfuil tú ag soláthar oideachas fóirsteanach do do pháiste, scríobhfaidh an ÚO chugat, ag iarraidh ort a léiriú go bhfuil do pháiste ag fáil oideachas lánaimseartha “a fhóireann dá (h)aois, dá c(h)umas agus dá (h)ábaltacht agus do riachtanais speisialta oideachais a bheadh aici nó aige...”.

C6: Cad iad na rioscaí a d’fhéadfadh a bheith ann mura gcuirfinn mo pháiste ar an rolla i scoil nuair a bhaineann sé nó sí aois éigeantach scoile amach?

Ba chóir duit fiafraí díot féin - an é seo an cinneadh is fearr do mo pháiste? Má roghnaíonn tú gan do pháiste a chur ar an rolla ar scoil nuair a bhaineann sí nó sé aois éigeantach scoile amach, éilíonn reachtaíocht go ndéanfaidh tuismitheoirí socruithe d’oideachas a bpáiste “a fhóireann dá (h)aois, dá c(h)umas agus dá (h)ábaltacht agus do riachtanais speisialta oideachais a bheadh aici nó aige agus go bhfaigheadh an páiste sin ar scoil nó ar dhóigh eile.”

Má dhéanann tú do chuid socruithe féin d’oideachas do pháiste go ceann bliain amháin agus má

tá rún agat ansin go gcuirfear oideachas ar do pháiste leis an bhliainghrúpa thíos faoina (h)aois croineolaíoch, bíodh a fhios agat go mbainfeadh do pháiste aois 16 bliana amach agus gurbh fhéidir leis nó léi, de réir dlí, an scoil a fhágáil sula mbeadh na scrúduithe TGMO (GCSE) nó cáilíochtaí coibhéiseacha críochnaithe aici nó aige.

Má dhéanann tú do chuid socruithe féin d'oideachas do pháiste nuair a bheadh do pháiste i mBliain 1 de ghnáth agus má dhéanann tú iarracht ansin í nó é a chur ar an rolla i mbunscoil, ligfear do pháiste isteach i mBliain 2 ar dtús. I ndiaidh an páiste a ligean isteach is é Bord na nGobharnóirí a dhéanfaidh an cinneadh oideachas a chur ar do pháiste taobh amuigh dá (h)aoisghrúpa croineolaíoch féin i ndiaidh do thuairimí féin, comhairle an Phríomhoide agus tuairimí an ÚO a chur san áireamh, ar son leas an pháiste.

Tabhair do d'aire, i dtaighde a rinneadh ar na mallaibh faoi stiúir Ofsted, gur léiríodh go ndéanann páistí atá níos óige dul chun cinn suntasach nuair a bhíonn siad ag foghlaim agus ag súgradh lena bpiaraí atá níos sine sna luathbhlianta. Baineann siad tairbhe as teanga níos casta a chluinstin agus as iompraíocht

phearsanta, shóisialta agus mhothúcháinach a fheiceáil in úsáid. Tógann an múinteoir (nó ceannaire an ghrúpa súgartha) ar eispéiris sin na bpáistí trí chlár foghlama a chruthú a dhéanann freastal ar riachtanais gach páiste aonair. Cuireann an clár sin le scileanna smaointeoireachta agus ábaltactaí pearsanta an pháiste.

C7: Má thosaíonn mo pháiste ar an scoil lena p(h)iaráí agus mura bhfuil sí nó sé in ann déileáil go maith le rudaí, cad é a tharlóidh?

Ní hionann gach páiste agus ní hionann na riachtanais atá ag páistí. Ar an ábhar sin b'fhéidir go mbeadh ar bhunscoileanna socruithe eile a chur i bhfeidhm le haghaidh ionduchtú agus aistriú go Bliain 1 le go gcuirfear san áireamh tosca ar leith an pháiste agus tacaíocht breise ar bith atá de dhíth. Mar chuid de sin áireofar riachtanais speisialta oideachais a d'fhéadfadh a bheith acu. Má tá imní ort faoi cad é chomh maith is atá do pháiste ag socrú isteach sa scoil, ba chóir duit teagmháil a dhéanamh le múinteoir ranga an pháiste agus na socruithe a phlé a d'fhéadfaí a chur i bhfeidhm le tacú leis nó léi.

3. Foinse: Ofsted -

<https://www.gov.uk/government/publications/teaching-and-play-in-the-early-years-a-balancing-act> - 13 Iúil 2015

C8: An féidir le mo pháiste bliain a athdhéanamh ar an bhunscoil?

I gcásanna eisceachtúla, is féidir le páiste bliain a athdhéanamh ar an bhunscoil. Is é Bord na nGobharnóirí a dhéanann an cinneadh sin, agus i ndiaidh do thuairimí féin, comhairle an Phríomhoide agus tuairimí an ÚO a chur san áireamh, ar son leas an pháiste.

C9: Cad é a tharlaíonn do pháiste a athdhéanann bliain (e.g. bliain ar bith bunscoile)?

Nuair a bhíonn páiste á theagasc le daltaí atá bliain ar chúl a (h)aoisghrúpa croineolaíoch féin, ba chóir, i mbunús na gcásanna, iarracht a dhéanamh an páiste a imeascadh arís lena (h)aoisghrúpa croineolaíoch a luaithe agus is féidir agus molann an Roinn go ndéanfadh Príomhoidí bunscoile athbhreithniú ar gach cás ar bhonn bliantúil. Mar sin féin, aithníonn an Roinn nach ionann cás amháin agus cás eile agus go gcaithfear gach cás a mheas ar a chuid buanna féin. Is é leas an pháiste an rud is tábhachtaí.

C10: Táthar le measúnú a dhéanamh ar mo pháiste le haghaidh ráitis ar riachtanais speisialta oideachais. Ar chóir dom iarratas a chur isteach ar áit bunscoile do mo pháiste nó fanacht leis an ráiteas?

Ba chóir duit iarratas a chur isteach ar áit bunscoile do do pháiste. Má fhaigheann do pháiste ráiteas de thoradh an mheasúnaithe, sonróidh an ráiteas an cineál scoile nó an cineál institiúide a mheasann an ÚO a bheadh fóirsteanach do riachtanais do pháiste. Má fhaigheann tú amach nach bhfuil an áit bunscoile de dhíth ort, ba chóir duit sin a chur in iúl don Phríomhoide a luaithe agus is féidir.

C11: Níl ráiteas riachtanais speisialta oideachais ag mo pháiste ach tá roinnt riachtanais bhreise aige nó aici. Cad é a tharlóidh nuair a thosóidh mo pháiste ar an bhunscoil?

Tá bunscoileanna breá ábalta tacaíocht a thabhairt do pháistí a bhfuil réimse riachtanas acu. Má tá imní ar bith ort faoin tacaíocht a gheobhaidh do pháiste ar an bhunscoil ba chóir duit labhairt leis an phríomhoide sa scoil a mbeidh do pháiste ag freastal uirthi.

Níl páiste atá os cionn aois éigeantach scoile i dteideal áite in oideachas réamhscoile maoinithe,

fiú má tá roinnt riachtanais bhreise ag an pháiste. Níl soláthar reachtach ann leis an ghnáthaois tosaíthe scoile a chur siar, ach nuair a shocraítear sa ráiteas riachtanais speisialta oideachais atá ag an pháiste go bhfuil sin riachtanach. B'fhéidir go mbeadh sé ina chuidiú cuairt a thabhairt ar roinnt scoileanna lena shocrú cad é an scoil ab fhearr a bheadh ábalta tacú le do pháiste.

C12: Cad é a tharlóidh más rogha liom mo pháiste a chur chuig scoil neamhspleách nuair atá sé nó sí in aois éigeantach scoile?

Is é is scoil neamhspleách ann, scoil ina soláthraítear oideachas lánaimseartha do dhaltaí in aois éigeantach scoile (aois 4-16), scoil nach bhfaigheann deontas ón Roinn. Is féidir le scoileanna neamhspleácha páistí a ligean isteach atá faoi 4 nó os cionn 16. Níl ceangal ar na scoileanna seo an curaclam reachtúil a chlúdach.

Má roghnaíonn tú do pháiste a chur chuig scoil neamhspleách, ba chóir duit teagmháil dhíreach a dhéanamh leis an scoil le socruithe a dhéanamh an páiste a chur ar an rolla mar go bhfuil na scoileanna taobh amuigh den phróiseas rollaithe a fheidhmíonn an tÚdarás Oideachais d'iontráil do Bhliain 1.



Aois Tosaithe Ar Scoil - Treoir Do Thuismitheoirí



Department of
Education
www.deni.gov.uk
AN ROINN
Oideachais
MÁNNYSTRE O
Lear



ea
**Education
Authority**
Udarás Oideachais
Lear Oideachais